

Kuala Nerang tiada saluran sawah padi

BH 29/1

SISTEM saluran yang baik adalah keperluan asas bagi sesebuah kawasan apatah lagi kawasan pertanian. Sistem saluran juga penting bagi mengawal banjir.

Kuala Nerang, sebuah kawasan pertanian di utara negeri Kedah dalam daerah Padang Terap bagaimanapun tidak menyediakan kemudahan ini kepada penduduknya, yang rata-ratanya pesawah.

Mungkin kerana daerah ini di luar kawasan Lembaga Kemajuan Muda (Mada), maka nasib petani di daerah ini seolah-olah dipandang sepi. Memerhati sistem saluran di dataran sawah Langgar (Kota Setar), daerah Yan, Kubang Pasu dan Bandar Baharu, saya kasihan memikirkan nasib pesawah di Kuala Nerang yang hanya mengharapkan hujan untuk tujuan pengairan mereka.

Jika ada parit pun, ia hanya dipenuhi air pada musim hujan. Jika perkara ini dibiarkan tanpa apa-apa tindakan, bagaimana mungkin kerajaan negeri merealisasikan gagasan 'Kedah Gemilang' dalam masa terdekat?

Penduduk tentu menyambut baik sekiranya ada usaha daripada kerajaan negeri untuk mewujudkan sistem pengairan yang sempurna untuk pertanian.

Sasaran menuai dua kali setahun tentu berjalan lancar. Mungkin juga penuaian mampu dilakukan tiga kali setahun kerana padi hanya memerlukan 120 hari untuk matang.

Saya mewakili petani Kuala Nerang

memohon pihak berkenaan menyediakan sistem pengairan yang sempurna di tempat kami. Penduduk sudah pasti akan bekerjasama kerana ini adalah untuk keuntungan mereka.

Selain penting untuk pertanian, sistem pengairan yang baik juga penting untuk mengelak daripada banjir atau sekurang-kurangnya mengawalinya supaya tidak menjadi lebih buruk seperti tahun lalu.

Purata banjir buruk berlaku di Kuala Nerang adalah setiap enam tahun. Pada 1986, 1992, 1997, 2002 dan terkini 2006 merekodkan banjir buruk yang berlaku di Kuala Nerang membabitkan Kampung Rambutan, Semeliang, Padang Lanjut, Kuala Kejai, Kurong Hitam, Bendang Raja, Kampung Mani dan banyak lagi.

Sungai Padang Terap adalah sungai yang mengalirkan air dari dua empangan iaitu Empangan Pedu dan Empangan Ah Ning. Sungai yang sempit dan cetek sudah tentu tidak mampu menampung kapasiti air yang tinggi terutama sekali ketika hujan lebat dalam jangka masa lama.

Ura-ura mengatakan kerajaan negeri ingin memohon peruntukan sebanyak RM986 juta daripada kerajaan pusat untuk membina tebatan banjir memang sedikit sebanyak memberi harapan. Di samping Kubang Pasu, Pendang dan Yan, kami mengharapkan Padang Terap turut tersenarai.

PETANI MENGHARAP,
Kuala Nerang, Kedah.